

登
科
記
考

登科記考卷二

大興徐松

唐高宗天皇大聖大宏孝皇帝

永徽元年

庚戌

正月辛丑朔改元

舊書
本紀

八月詔曰昔勳華肇政仁義居先殷周創基教學成本朕嗣立鴻基裁成丕緒如臨於海罔知攸濟思得學徒用康庶績而頃歲所敦先諸聖教青襟方領未達至懷惟欲思轅固以加班想高堂以授秩斯文寥落去之彌遠深加發慮稱朕意焉儒官員缺卽宜補授其館博士助教節級賜物三館學生有業科高第景行滄良者

所司簡試具以名聞

冊府元龜

是年敕太尉長孫无忌司空李勣左僕射于志寧右僕射張行成
侍中高季輔黃門侍郎宇文節柳奭左丞段寶元太常少卿令狐
德棻吏部侍郎高警刑部侍郎劉燕客給事中趙文中書舍人李
友益少府丞張行實大理丞元紹太府丞王文端刑部郎中賈敏
行等共撰定律令格式舊制不便者皆隨有刪改

冊府元龜

秀才一人

劉釜

玉海引登科記

進士十四人

二年

辛亥

三月十四日詔太尉趙國公長孫无忌及中書門下國子三館博士宏文學士故國子祭酒孔穎達所撰五經正義按孔穎達卒於貞觀二十二年

事有遺謬仰卽刊正唐會要

閏九月長孫无忌等上所刪定律令式甲戌詔頒之四方通鑑

秀才玉海引登科記云是年始停秀才舉按新書韓思復傳舉秀才高第思復在永徽後所謂秀才者卽進士科也

進士二十五人

三年壬子

詔曰律學未有定疏每年所舉明法遂無憑準宜廣召解律人條

義疏奏聞仍使中書門下監定舊書刑法志

應制及第

雲麓漫鈔於制科及第下注云永徽三年是此年有制科也

不貢舉

四年

癸丑

二月二十四日太尉長孫无忌等表上五經正義曰臣无忌等言臣聞混元初闢三極之道分焉醕德既醕六籍之文著矣於是龜書浮於溫洛爰演九疇龍圖出於滎河以彰八卦故能範圍天地埏埴陰陽道濟四溟知周萬物所以七教八政垂炯誠於百王五始六虛貽徽範於千古詠歌明得失之迹雅頌表興廢之由實刑政之紀綱乃人倫之隱括昔雲官司契之后火紀建極之君雖步

驟不同質文有異莫不開茲膠序樂以典墳敦稽古以宏風剛儒
雅以立訓啟含靈之耳目贊神化之丹青姬孔發揮於前荀孟抑
揚於後馬鄭迭進成均之望鬱興蕭戴同昇石渠之業愈峻歷夷
險其教不墜經隆替其道彌尊斯乃邦家之基王化之本者也伏
惟皇帝陛下得一繼明通三撫運乘天地之正齊日月之暉敷四
術而緯俗經邦蘊九德而辨方軌物御紫宸而訪道坐元扈以裁
仁化被丹澤政治幽陵三秀六穗之祥府無虛月集囿巢閣之瑞
史不絕書照金鏡而泰階平運玉衡而景宿麗可謂鴻名軼於軒
昊茂績冠於黜華而垂拱无爲遊心經典以爲聖教幽蹟妙理深

元訓詰紛綸文疏駘駁先儒競生別見後進爭出異端未辨三豕之疑莫祛五日之惑故祭酒上護軍曲阜縣開國子孔穎達宏才碩學名振當時貞觀年中奉勅修撰雖加討覈尙有未周爰降絲綸更令刊定勅太尉揚州都督監修國史上柱國趙國公臣无忌司空上柱國英國公臣勣尙書左僕射兼太子少師監修國史上柱國燕國公臣志寧尙書右僕射兼太子少傅監修國史上護軍曲阜縣開國公臣行成光祿大夫侍中兼太子少保監修國史上護軍蔣縣開國公臣季輔光祿大夫吏部尙書監修國史上柱國河南郡開國公臣褚遂良銀青光祿大夫守中書令監修國史上

騎都尉臣柳奭前諫議大夫宏文館學士臣谷那律國子博士宏
文館學士臣劉伯莊朝議大夫國子博士臣王德韶朝散大夫行
太學博士臣賈公彥朝散大夫行太學博士宏文館直學士臣范
義頴朝散大夫行太常博士臣柳宣通直郎太學博士臣齊威宣
德郎守國子助教臣史士宏宣德郎守太學博士臣孔志約右內
率府長史宏文館直學士臣薛伯珍太學助教臣鄭祖元徵事郎
守太學助教臣隨德素徵事郎守四門博士臣趙君贊承務郎守
太學助教臣周元達承務郎守四門助教臣李元植儒林郎守四
門助教臣王真儒等上稟宸旨旁撫羣書釋左氏之膏肓翦古文

之煩亂探曲臺之奧趣索連山之元言囊括百家森羅萬有比之
天象與七政而長懸方之地軸將五嶽而永久筆削已了繕寫如
前臣等學謝伏恭業慚張禹雖罄庸淺懼乖典正謹以上聞伏增
戰越謹言永徽四年二月二十四日太尉揚州都督上柱國趙國
公臣无忌等上

北宋周易
單疏本

三月壬子朔頒孔穎達五經正義於天下每年明經令依此考試
舊書
本紀

十一月十九日太尉長孫无忌等表上律疏曰臣无忌等言臣聞
三才既分法星著於元象六位斯列習坎彰於易經故知出震乘

時開物成務莫不作訓以臨函夏垂教以牧黎元昔周后登極呂
侯闢其茂範虞帝納麓皋陶創其彝章大夫之述三言金篆騰其
高軌安衆之陳九法玉牒播其宏規前哲比之以隄防往賢譬之
以銜勒輕重失序則繫之以存亡寬猛乖方則階之以得喪泣辜
慎罰文命所以會昌斯脛剖心獨夫於是盪覆三族之刑設禍起
於望夷五虐之制興師亡於涿鹿齊景綱峻時英有踊貴之談周
幽獄繁詩人致菀柳之刺所以當塗撫運樂平除慘酷之刑金行
提象鎮南削煩苛之法而體國經野御辨登樞莫不崇寬簡以宏
風樹仁惠以裁化景胄以之碩茂寶祚於是克崇徽猷列於緡圖

鴻名勒於青史暨炎靈委御人物道銷霧翳三光塵驚九服秋卿
司於邦典高下在心獄吏傳於爰書出沒由己內史溺灰然而被
辱丞相見牘背而行昧戮逮棄灰誅及偶語長平痛積冤之氣司
敗切瘦死之魂遂使五樓之羣爭迴地軸十角之旅競入天田國
步於是艱難刑政於焉弛素殷憂俟來蘇之后多難佇撥亂之君
大唐握乾符以應期得天統而御歷誅阪泉之巨猾勦丹浦之凶
渠掃旬始而靜天綱廓妖氛而清地紀朱旗乃舉東城高滅楚之
功黃鉞裁麾西土建翦商之業總六合而光宅包四大以凝旒異
域於是來庭殊方所以受職航少海以朝絳闕梯崑山以謁紫宸

椎髻之酋加之以文冕窮髮之長寵之以徽章王會之所不書塗
山之所不紀歌九功以協金奏運七政以齊玉衡律增甲乙之科
以正澆俗禮崇升降之制以拯頽風蕩蕩巍巍信無德而稱也伏
惟皇帝陛下體元纂業則大臨人覆載並於乾坤照臨運於日月
坐青蒲而化光四表負丹旻而德被九圍日旰忘餐心存於哀矜
宵分不寐志在於明威一夫向隅而責躬萬方有犯而罪已仍慮
三辟攸斃八刑尙密平反之吏從寬而失情次骨之人舞智而陷
網刑靡定法律無正條徽纆妄施手足安措乃制太尉揚州都督
監修國史上柱國趙國公長孫无忌司空上柱國英國公李勣尙

書左僕射兼太子少師監修國史上柱國燕國公于志寧尙書右
僕射監修國史上柱國開國公褚遂良銀青光祿大夫守中書令
監修國史上騎都尉柳奭銀青光祿大夫守刑部尙書上輕車都
尉唐臨太中大夫守大理卿輕車都尉段寶元太中大夫守黃門
侍郎護軍潁川縣開國公韓瑗太中大夫守中書侍郎監修國史
驍騎尉來濟朝議大夫守中書侍郎辛茂將朝議大夫守尙書右
丞輕騎都尉劉燕客朝請大夫使持節潁川諸軍事守潁川刺史
輕車都尉裴宏獻朝議大夫守御史中丞上柱國賈敏行朝議郎
守刑部郎中輕車都尉王懷恪前雍州益州縣令雲騎尉董雄朝

議郎行大理丞護軍路立承奉郎守雍州始平縣丞驍騎尉石士
達大理評事雲騎尉曹惠果儒林郎守律學博士雲騎尉司馬銳
等撫金匱之故事採石室之遺書捐彼凝脂敦茲簡要網羅訓詁
研覈邱墳撰律延三十卷筆削已了實三典之隱括信百代之準
繩銘之景鍾將二儀而並久布之象魏與七曜而長懸庶一面之
祝遠超於殷簡十矢之歎永弭於漢圖謹詣朝堂奉表以聞臣无
忌等誠惶誠恐頓首頓首永徽四年十一月十九日進
頒新律疏於天下
不貢舉

舊書
本紀

唐律
義疏

應制及第三人

五年

甲寅

進士一人

六年

乙卯

進士四十三人

應制一人

按應制下脫及第二字

七年

丙辰

正月壬申改元爲顯慶元年

舊書本紀

三月十六日皇太子宏請於崇賢館置學士並生徒詔許之

唐會要

十月詔曰朕受命上元嗣膺下武每肅恭冕旒延想英奇俯振驚
而企貞臣仰飛鴻而慕良輔雲臺側席玉管屢移宣室整衣金壺
亟改寂寥靡覩鑒寐興懷比年雖嘗進舉遂無英俊猶恐棲岩穴
而韜奇樂邱園而晦影宜令河南河北江淮以南州縣或緯俗之
英聲馳管樂或濟時之器價軼蕭張學可帝師材堪棟輔者必當
位之不次可明加採訪務盡才傑州縣以禮發遣

唐大詔
令集

十二月乙酉置算學

舊書本紀 按職官志武
德初廢算學此年復置

進士三人

蘇瓌

舊書本傳瓌隋尚書右僕射威曾孫祖夔父勗
瓌弱冠本州舉進士 盧藏用蘇瓌神道碑瓌

字昌容京兆武功人幼而岐嶷聰敏冠常始讀山棲志一覽便誦
及長博緯經史尤善屬詞年十八進士高第以景雲九年卒年七

十二推之及
第在是年

顯慶二年丁巳

二月唐大詔令詔曰濟時興國實佇九功禦敵威邊亦資七德朕
集作六月

端拱宣室思宏景化將欲分憂俊乂共逸岩廊而比者貢寂英奇
舉非勇傑豈稱居安慮危之志處存思亂之心如不旌賁遠近則
爪牙何寄宜令京官五品以上及諸州牧守各舉所知或勇冠三
軍剋闢拔山之力智兼百勝緯地經天之才蘊奇策於良平馳功
績於衛霍蹤二起於吳白軌雙李於牧廣賞織善而萬衆悅爵片
惡而一軍懼如有此色可精加採訪各以奏聞
冊府元龜 按劉
仁願紀功碑顯慶

二年應詔舉文武高第升
進二階疑卽應此詔也

進士二十二人

三年戊午

二月策志烈秋霜科冊府元龜

七月上謂宰臣曰四海之廣唯在得賢卿等用人多作形迹護一作

讓避親知不能盡意甚爲不取昔祁奚舉子古人以爲美談卽使

卿等兒姪有材亦須依例進舉通典冊府元龜

九月廢書算律學舊書本紀

是年黃門侍郎劉祥道以選舉漸弊陳奏其三曰雜色人請與明

經進士通充入流之數以三分之論每二分取明經進士一分取
雜色人其四曰

本傳作其三

儒爲教化之本學者之宗儒教不興風俗

將替今庠序徧於四海儒生溢於三學勸誘之方理實爲備而獎
進之道事或未周但永徽以來於今八載在官者以善政粗聞論
事者以一言可採莫不光被諭旨超升不次而儒生未聞恩及臣
故以爲獎進之道未周其五曰

本傳作其四

國家富有四海於今已四

十年百姓官僚未有秀才之舉未知今人之不如昔將薦賢之道
未至豈可方稱多士遂闕斯人請六品以下爰及山谷特降綸言
更審搜訪仍量爲條例稍加優獎不然赫赫之辰斯舉遂絕一代

盛事實為朝廷惜之錄餘不奉勅付所司集羣官詳議者多難於改

作事竟不行通典舊書劉祥道傳

進士十七人 崔禹錫唐詩紀事崔禹錫字洪範登顯慶三年進士第為中書舍人

明經科 康希銑顏魯公康使君神道碑銘君諱希銑字南金會稽人年十四明經登第補右內率府胄曹應詞

藻宏麗舉甲科拜秘書省校書郎轉左金吾衛錄事參軍應博通文史舉高第授太府寺主簿轉丞又應明於政理舉拜洛州河清

令以開元三年卒年七十一推之明經登第當在是年

諸科一人

志烈秋霜科 韓思彥冊府元龜唐會要新書韓思彥傳思彥字英遠鄧州南陽人志烈秋霜科擢第

楊炯右將軍魏哲神道碑公諱哲字知人鉅鹿陽曲人顯慶三年詔除左衛清宮府左果毅都尉尋圉谷府折衝都尉並長上如

故又以應詔舉對策甲科遷左騎衛郎將四年詔公為鐵勒道行軍總管按是年不見他科疑亦志烈秋霜科及第

四年己未

二月乙亥上親策試舉人

冊府元龜作引諸色目舉人謁見下策詔問之

凡九百人

冊府元龜

作九百餘人

惟郭待封張九齡五人居上第

按徐浩撰張九齡碑九齡卒於開元二十八年

十三則生於調露元年上距顯慶四年尚二十一年舊志誤冊府元龜載五人無張九齡

令待詔宏文館隨仗

供奉

舊書本紀

進士二十人

詞學指南顯慶四年進士試闕內父老迎駕表貢士箴

明經科 尹思貞

舊書本傳京兆長安人弱冠明經舉以開元四年年七十七推之是年二十歲

洞曉章程科

材稱棟梁志標忠饒科

政均卓魯字俗之化通

按通字疑有誤高科

安心畝畝力田之業夙彰科

道德資身鄉閭共挹科

養志邱園嘉遁之風載遠科

材堪應募科

學綜古今科

按以上諸科皆見雲麓漫鈔是年設科最多故本紀言試舉人九百人也

李巢

張昌宗

秦相如

崔行功

行功恆州井陘人見舊書文苑傳

郭待封

冊府元龜載是年制科五人卽

本紀所云五人居上第也第統言制科不知某人舉某科今附於此科之下以俟考

五年庚申

六月辛卯詔文武五品以上

冊府元龜作內外官

四科舉人或孝悌可稱德

行風著通涉經史堪居繁劇或游泳儒術沈研冊府下帷不倦博

物馳聲或藻思清華詞鋒秀逸譽標文雅材堪遠大或廉平處事

疆直爲心洞曉刑書兼苞文藝者精加搜訪各以名薦

舊書本紀冊府元

龜按張說贈太州刺史楊志誠碑明慶中詔郡國舉賢良公對策天朝無能出其右者疑即此年四科舉也又按河朔訪古記載藁城縣九門城西有唐高宗上元三年建浮圖碑題云唐應詔四科舉董行文撰文寶刻叢編載集古錄目引作前應詔四科舉董行文思當亦此年制舉

進士十四人

上書拜官一人

六年

辛酉

三月丙申朔改元龍朔元年

舊書本紀 通鑑作二月乙未晦改元

進士五人

召拜官一人

按新書祝欽明傳父緄字叔良門人張後允既顯宦薦於朝詔對策高第疑即其人也

諸科

楊炯

郡齋讀書志楊炯華陰人顯慶六年舉神童授校書郎舊書文苑傳炯幼聰明博學善屬文神童舉

按炯是年

十二歲

應制及第

高口

陳子昂離狐縣丞高府君墓誌銘君諱某龍朔元年有制舉忠鯁君對策及第試永州湘源縣

尉

按顯慶四年有志標忠鯁制科制舉忠鯁殆亦此類

登科記

卷二

三

龍朔二年

壬戌

正月丙午

唐會要作十八日

東都初置國子監并加學生等員均分於兩

都教授

舊書本紀

改國子監爲司成館

唐會要

五月乙巳復置律書算三學

舊書本紀

九月勅學生在學各以長幼爲序初入學皆行束脩之禮禮於師

國子太學各絹三疋四門學各絹二匹俊士及律書算學州縣學

各絹一匹皆有酒脯其束修三分入博士二分助教又每年國子

監所管學生國子監試州縣學生常州試並選藝業優長者爲試

官仍長官監試言

進士八人

明經科

崔元暉

舊書本傳元暉博陵安平人父行謹為胡蘇令元暉少有學行深為叔父秘書監行功所器重

龍朔中
舉明經

三年

癸亥

正月詔以書學隸蘭臺算學隸秘閣律學隸詳刑寺

舊書本紀

八月詔內外官五品以上各舉嚴敷幽素之士廣加詢訪旁求謠

俗式企英材允毗闕政

冊府元龜按舊書本紀八月癸卯彗星見於左攝提戊申詔百寮極言正諫令內

外官五品以上各舉所知

登科記考

卷二

三

十二月庚子詔改來年正月一日爲麟德元年

舊書本紀

不貢舉

麟德元年

甲子

七月丁未朔詔宜以三年正月式遵故實有事於岱宗所司詳求
茂典以從折衷其諸州都督刺史以二年十二月便集嶽下諸王
十月集東都緣邊州府襟要之處不在集限天下諸州明揚才彥
或銷聲幽藪或藏器下僚並隨嶽牧舉送

冊府元龜

進士三人

諸科二人

茂材異行科見雲麓漫鈔

銷聲幽藪科

嚴善思

舊書方伎傳嚴善思同州朝邑人初應銷聲幽藪科舉擢第則天時為監察御史

按記纂淵海麟德元年應銷聲幽藪科一人殆即嚴善思也新書嚴善思名諱以字行父延

藏器下僚科

平貞脊

張說常州刺史平貞脊神道碑補廬州慎縣尉刺史盧寶允舉藏器下僚轉冀州大

都督府曲沃縣尉換晉州洪洞縣主簿北平陽道听河東裴知禮薦以經邦興化徙雍州新豐縣尉

經明行脩科

李思訓

李邕雲麾將軍碑公諱思訓字建隴西狄道人年十四補崇文生舉經明行脩甲科

按碑言思訓卒於開元四年年六十六是年為十四歲唐書本傳作卒於開元六年者誤

二年乙丑

進士並落下

唐語林高宗時進士特難其選龍朔中勅左史董思恭與考功員外郎權崇原同試貢舉思恭吳士輕脫

洩進士問目三司推贓汚狼籍命西朝堂斬決告變免死除名流
梧州按思恭與皇太子宏撰瑤山玉彩其書成於龍朔三年三月
其年不貢舉所云洩進士問目或
卽此年事而進士因之落下歟

三年

丙寅

正月戊辰朔車駕至泰山己巳行封禪之禮壬申改麟德二年爲

乾封元年

舊書
本紀

辛卯至曲阜詔曰朕聞德契機神盛烈光於後代化成天地元功
被於庶物魯大司寇宣尼父孔某資大聖之材屬衰周之末恩欲
屈己濟俗宏道佐時應聘周流莫能見用想乘桴以永嘆因獲麟
而興感於是垂素王之雅則正魯史之繁文播鴻業於一時昭景

化於千祀朕嗣膺寶歷祇奉睿圖憲章前王規矩先聖崇至公於
海內行大道於天下遂得八表乂安兩儀交泰功成化洽禮盛樂
和展采東巡迴輿西土塗經茲境撫事興懷駐蹕荒區願爲師友
瞻望幽墓思承格言雖宴寢荒蕪餘基尙在靈廟虛寂徽烈猶存
孟軻曰自生人以來未有若孔子者也微禹之歎旣深褒崇之道
宜峻可追贈太師庶年代雖遠式範令圖景業惟新儀型茂實其
廟宇制度卑陋宜更加修造仍令三品一人以少牢致祭褒聖侯
德倫旣承允緒有異常流其子孫並宜免賦役主者施行

通鑑
贈太師

孔宣公碑陰 舊書云甲午至曲阜按碑載此爲
正月二十四日詔二十四日爲辛卯當從通鑑

進士是年不言貢舉蓋有貢

王上客劉禹錫王俊神道碑大父上客高宗封岳進士及第

魏知古舊書本傳深州陸渾人性方直早有才名弱冠舉進士以開元三年卒年六十九推之是年二十歲

幽素科十二人記纂淵海作十三人蘇瓌見冊府元龜唐會要解琬見冊府元龜唐會要

書本傳魏州元城人少應幽素舉拜新政尉苗神客見冊府元龜唐會要格輔元見冊府元龜唐會要

舊書岑文本傳格輔元汴州浚儀人新書輔元父處仁徐昭見冊府元龜唐會要劉訥言見冊府元龜唐會要

會崔谷神見冊府元龜唐會要郭敬同孫翌教子郭府君墓誌嚴王

勃舊書文苑傳王勃年未及冠應幽素舉及第按王勃春思賦序咸亨二年余春秋二十有二則是年十七故曰未及冠唐才

子傳王勃六歲善詞章麟德初劉祥道表其才對策高第

乾封二年丁卯

十月令天下諸州舉鴻儒碩學博聞彊記之士冊府元龜

進士五人

詞贍文華科

直言極諫科

雲麓漫鈔列此二科於幽素之次皆係乾封元年按二年有舉鴻儒碩學之詔則詞贍文華必在此年故

與直言極諫並隸於此

三年戊辰

二月丙寅改元爲總章元年

舊書本紀新書作三月庚寅

三月舊書作二月癸未新書作三月丁巳

詔曰皇太子宏近因釋菜齒胄上庠祇事

先師馳心近侍仰崇山而景行眷曩哲以勤懷頌顏曾之特高揚

仁義之雙美請申褒贈載甄芳烈朕嘉其進德冀以思齊訓誘之

方莫斯爲尙顏回可贈太子少保

冊府元龜

按舊書本紀贈顏回太子少師曾參太子少保

進士二十六人

總章二年己巳

不貢舉

三年

庚午

三月甲戌朔大赦天下改元爲咸亨元年

舊書本紀

五月丙戌詔曰諸州縣孔子廟堂及學館有破壞并先來未造者

遂使生徒無肄業之所先師闕奠祭之儀久致飄露

冊府元龜作零

深非

敬本宜令所司速事營造

舊書本紀

改司成館復爲國子監

唐會要

進士五十四人

宋守節

狀元

杜審言

唐才子傳審言字必簡京兆人預之遠裔咸亨元年

宋守節榜進士爲隰城尉舊書文苑傳杜易簡從祖弟審言進士舉

高瑾

唐詩紀事高瑾高士廉之孫登咸亨元年進士

第

咸亨二年

辛未

十月丙子詔曰禮樂之用其來尙矣朕誕膺明命克光丕厯思隆

頌聲以康至道而曲臺闡訓猶乖揖讓之容大樂登歌徒紀鏗鏘

之韻良以教虧綿蕞學闕瞽宗興言盛業寤寐盈抱然則幽誠所

著縱九舉而必聞忠信所存在十室而無棄但慮習俎之彥韞跡
於閭閻辨鐸之英韜深於林藪夫良玉無脛求之斯來真龍難覩
好之而至其四方士庶及邱園棲隱有能明習禮樂詳定音律於
行無違在藝可錄者宜令州縣搜揚博訪具以名聞

舊書本紀冊
府元龜 唐

大詔
令集

不貢舉

按唐詩紀事弓嗣初咸亨二年第
一人登第二年疑四五年之訛

三年

壬申

不貢舉

四年

癸酉

進士七十九人

郭震

新書本傳郭元振名震以字顯舊書魏州貴鄉人張說郭元振行狀十六入太學

與薛稷趙彥昭同業年十八擢進士第其年判入高

等以開元元年卒年五十八推之當於是年及第

李迥秀新書

迥秀及進士第按迥秀於五年舉英材傑出科年弱冠前數年不貢舉故附四年

拔萃科

郭震

撫言載震今年及第明年登科今從行狀

諸科

馬懷素

舊書本傳潤州丹徒人五編誦詩禮騷雅能屬文

墓誌銘懷素字貞規十

見器異舉孝廉引同載入洛

按咸亨四年懷素年十五舊

書本傳言舉進士墓誌不載蓋即舉孝廉之誤也今從墓誌

知貢舉

杜易簡

舊書文苑傳杜易簡咸亨中為考功員外郎按新書李敬元恨杜易簡為吏部侍郎召易簡為

考功員外郎屈之敬元為吏部侍郎在咸

亨三年則易簡當於三年即為考功矣

五年

甲戌

八月改咸亨五年爲上元元年

舊書本紀

詔五品以上各舉所知

冊府元龜

十二月二十七日

舊書本紀作壬寅

天后上表曰伏以聖緒出自元元五

千之文實唯聖教望請王公以下內外百官皆習老子道德經其

明經咸令習讀一準孝經論語所司臨時策試請施行之

唐會要舊書

本紀作天后上意見十二條請王公百寮皆習

老子考后妃傳習老子爲十二條中第八事

是年有劉曉者

通鑑作劉曉

上疏曰國家以禮部爲孝秀之門考文章

於甲乙故天下響應馳驅於才藝

通鑑作文藝後同

不矜於德行夫德行

者可以化人成俗才藝者可以約法立名故有朝登甲科而夕陷

刑辟制法守度使之然也陛下焉得不改而張之至如口誦萬言
何關理體文成七步未足化人昔子張學干祿仲尼曰言寡尤行
寡悔祿在其中矣又曰行有餘力則以學文今舍其本而循其末
況古之作文必諧風雅今之末學不近典謨勞心於草木

通鑑作
萍木

之間極筆於烟雲

通鑑作
烟霞

之際以此成俗斯大謬也昔之採詩以

觀風俗詠卷耳則忠臣喜誦蓼莪我而孝子悲溫良敦厚詩教也豈
主於注文哉夫人之愛名猶水之就下上有所好下必甚焉陛下
若以德行爲先才藝爲末必敦德勵行以仁甲科鄧舒俊才沒而
不齒陳實長者拔而用之則多士雷奔四方風動風動於下聖理

於上豈有不變者歟

通典按是時貢舉未歸禮部而言禮部為孝秀之門恐誤通鑑引亦作禮部取士

進士五十七人重試及第十一

人周彥輝

唐詩紀事彥輝登咸亨五年進士

張守貞

撫言咸亨五年七世伯祖鸞臺鳳閣龍石白水公時任考功員外郎下覆試十一人內張守貞一人鄉貢

知貢舉王方慶

撫言鸞臺鳳閣龍石白水公任考功員外郎按舊書方慶傳封白泉縣男遷鸞臺侍郎同鳳閣

鸞臺平章事俄轉鳳閣侍郎則所謂鸞臺鳳閣者即方慶也白水為泉字之訛龍字衍文傳雖不言為郎中員外事而高宗紀永淳

元年有吏部郎中王方慶是咸亨時得為員外郎也

英材傑出科

李迥秀

舊書李大亮傳迥秀大亮族孫也弱冠應英材傑出舉拜相州參軍按新書迥秀卒

於代姚崇為兵部尚書時年五十事在長安四年則弱冠在咸亨五年是年有詔舉所知蓋即制科也

上元二年

乙亥

正月

唐會要作正月十四日

敕明經加試老子策二條

唐會要作三條

進士加試帖

三條

冊府元龜新書選舉志言是年加試貢士老子策明經二條進士三條

按進士試帖謂帖老子是時尙無帖經之制

則試帖當

作試策矣

八月二十七日改崇賢館爲崇文館

唐會要按避章懷太子諱也館在東宮左春坊南

進士四十五人

鄭益

狀元

沈佺期 唐才子傳沈佺期字雲卿相州人上元二年鄭益榜進士

舊書文苑傳沈佺期相州內黃人進士舉

宋之問

唐才子傳宋之問字延清汾州人上元二年進士

劉希夷

唐才子傳劉希夷字廷芝潁川人上元二年鄭益榜進士時年二十五射策有文名按希夷宋之問之甥

梁載言

書錄解題梁載言

張鷟

舊書張鷟傳張鷟初登進士第對策尤工考功員外郎鷟味道賞之曰如此生

上元二年進士

天下無雙矣又應下筆成章及才高位下詞標文苑等科凡應八舉皆登甲科

太平廣記引朝野僉載鷟初舉進士至懷州夢慶

雲覆其身其年對策考功員外郎驚味道以為天下第一
 風土記張鷟字文成深州陸渾人弱冠應下筆成章凡七應舉四
 參選皆中甲科按容齋續筆引登科記云上元二年進士四十五
 人薦名皆二十九既以為無雙而不列高第神龍元年才膺管
 樂科於九人中為第五景雲二年中賢良方正科於
 二十人中為第三所謂制舉八中甲科亦不然也 陳該 陳子
 故內供奉學士懷州河內縣尉陳該石人銘君諱該字彥表歸州
 顯武人少好學能屬文上元元年州貢進士對策高第釋褐授將
 仕郎按元年鄉貢是登第在二 附不疑 通志氏族畧上元登科
 年故三年得應詞鄉文律科也 有附不疑 按上元改
 元在八月則無元年貢舉

三年不貢舉故知在此年

別救二人

按別救撫言謂即別頭是不始於開元二十九年矣二當作四

錢令緒 鄭人政

王愷

崔志恂

撫言別頭及第始於上元二年錢令緒鄭人政王愷崔志恂等四人亦謂承優及第

續試三人

應制及第

楊炯

楊炯渾天賦序顯慶五年炯時年十一待制宏文館上元二年始以應制舉補校書郎

知貢舉

驚味道

見上張鷟注

三年

丙子

正月策詞碑文律科

冊府元龜

閏三月令京官五品以上及諸州都督刺史各舉所知一人

冊府元龜

十一月壬申改上元三年曰儀鳳元年

舊書本紀

十二月詔曰山東江左人物甚衆雖每充賓薦而未盡英髦或孝

悌通神遐邇推敬或德行光俗邦邑崇仰或學綜九流垂帷觀奧

或文高六藝

一作義

下筆成章或備曉八音洞該七曜或射能穿札

力可翹關或邱園秀異志存棲隱或將帥子孫世稱勇烈委巡撫

大使咸加採訪仁申褒獎亦有婆娑鄉曲負材傲俗爲譏議所斥

陷於跖弛之流者亦宜選擇具以名聞

冊府元龜
唐大詔令集

不貢舉

張說故宣威將軍楊君碑公諱令一字令一太州仙掌人
年十九舉進士高第授潞州參軍以聖歷元年卒年四十

一推之及第在是年登科記
既有諸科則言不貢舉者誤

諸科四人

詞碑文律科

崔融

冊府元龜
州全節人應入科舉擢第新書融字安成

唐會要

舊書本傳崔融齊

陳該

陳子昂陳該石人銘上元元年之明年制勅天下文儒司屬
少卿楊若訥薦君應詞碑文律對策高第勅授茂州石泉縣

簿主

文學優贈科

馬懷素

舊書本傳應制舉登文學優贈科
銘公年甫弱冠以文學優贈對策乙科乃

尉郡無何丁太夫人憂服闋授麟臺正字京兆韋方直善飛白以公既及冠禮未嘗立字遂大署飛白云懷素字貞規以開元六年卒年六十推之咸亨四年年十五舉孝廉服闋後云既及冠是應制舉時未及二十也是年有制科或文學優贈科亦在是年故載此於

口口科

員半千

舊書文苑傳上元初應入科舉授武陟尉
江都幾雜志白水縣堯山民掘得誌石是員半

千墓云十八代祖凝自梁入魏本姓劉

陽嶠

舊書良吏傳陽嶠

彭城人以其雅正似伍員遂賜姓員

中應入科舉

裴守貞

舊書孝友傳裴守貞絳州稷山人後魏冀

授蔣陵尉
州刺史叔業六世孫父春貞觀中官至鄴

令守貞早孤初舉進士及應入科舉累轉乾封

郡屬

儀鳳二年

丑丁

十二月詔京文武職事三品以上官每年各舉所知或才蘊廊廟器均瑚璉體王佐之嘉猷資公輔之宏量或奇謀異算決勝千里或投石拔距勇冠三軍或譽謬忠亮志存匡弼或繩違糾慝不避權豪或威惠仁明堪居守牧之重或公正廉直足膺令長之任咸宜搜訪具錄封進朕當詳覽量加獎擢

冊府元龜
唐大詔令集

不貢舉

上封拜官一人

下筆成章科

按去冬下詔應
科舉在是年

張薦

見上

姚元崇

舊書姚崇傳
本名元崇陝

州陝石人元崇爲孝敬挽郎
應下筆成章舉授濮州司倉

韓思彥

新書韓思彥傳萬年令李
乾祐異其才舉下筆成章

科

王無競

舊書文苑傳王無競有文學初應下筆成章舉及第解褐授趙州樂城縣尉孫述王無競墓誌公諱無

競字仲烈其先郎邪人因官家於東萊弱冠以應制擢第

三年

戊寅

三月

冊府元龜作正月

勅自今已後道德經孝經並為上經貢舉人並須

兼通其餘經及論語任依常式

冊府元龜唐會要

四月戊申改來年正月一日為通乾

舊書本紀

十二月癸丑詔停明年通乾之號

新書本紀

不貢舉

陳憲墓誌銘公諱憲字令將平陽臨汾人年三十鄉貢進士對策上第其年解褐榮澤主簿以開元十三年薨春秋

七十八以年推之當是儀鳳二年鄉貢進士次年上第又按舊書鄭惟忠傳儀鳳中進士舉授井陘尉是儀鳳中有進士張九齡徐

堅神道碑上元中遭姜太夫人之喪服闋州辟秀才其年登科解
巾補汾州參軍事是登第亦在儀鳳中而此數年皆言不貢舉恐
登科
記誤

諸科一人

四年 己卯

六月辛亥改儀鳳四年爲調露元年

舊書本紀

七月己卯朔詔以今年冬至有事嵩岳

舊書本紀

是月詔令諸州明揚仄陋或孝弟純至感於神明或文武兼資才

堪將相或學藝該博業標儒首或藻思宏麗詞擅文宗或洞曉音

律識均牙曠或深明歷數妙同京管者咸令薦舉

冊府元龜 記 纂淵海引登科

記

十月庚申前詔封嵩山宜停

舊書本紀

十二月壬子帝臨軒引岳牧舉人問之曰兵書云天陣地陣人陣各何謂也武陟尉員半千對曰臣觀載籍多謂天陣星宿孤虛也地陣山川向背也人陣偏伍彌縫也臣以爲不然夫師出以義有若時雨得天之時此天陣也兵在足食且耕且戰得地之利此地陣也三軍使兵士如父子兄弟

會要作士卒輕利將帥和睦

得人之利此人陣也三者去矣將何以戰帝又問皇道帝道王道何以區別朕今可行何道長壽令蕭思問越州參軍周彥昭以次應詔帝皆稱善

甲寅御製問目以試之

冊府元龜 會要載此事於永隆元年 按舊書本紀與冊府元龜同今從之

不貢舉

調露二年

庚辰

考功員外郎劉思立奏明經進士二科並加帖經又加老子孝經

使兼通之

通典 按此調露二年事故列於收 元永隆之前 按此為帖經之始

八月乙丑改調露二年為永隆元年

舊書本紀

十二月詔縣令刺史御史員外郎太子舍人司儀郎左右史文武

五品以上清要近侍及宿衛之官並令舉所知一人

冊府元龜

進士一人

按一人 疑有誤

蘇頌

新書蘇瓌傳瓌子頌字延碩舊書頌少 有俊才一覽千言弱冠舉進士 讀書

志蘇頌武功人調露二年進士按蘇頌卒於開元十五

李福業

年年五十八是年方十一歲讀書志所載未知何據

唐詩記事李福業

宋璟

顏魯公集廣平文貞公宋公神道碑銘

調露二年登第

易曠時不精公遲而覽之自亥及寅精義必究明年進士高第以

開元二十五年卒年七十五推之十六七當儀鳳三四年皆不貢

舉則及第在此年矣舊書本傳

琮博學工於文翰弱冠舉進士

岳牧舉

員半千

舊唐書文苑傳員半千本名餘慶晉州臨汾人上元初應八科舉授武陟尉又應岳牧舉高宗

御武成殿召諸州舉人親問半千越次而對高宗甚嗟賞之及對

策擢爲上第冊府元龜永隆元年岳牧舉武陟尉員半千及第

殷楷

馮宿殷公家廟碑工部府君諱楷字文約高宗朝四岳舉高第釋褐拜雍州新豐尉按四岳舉卽岳牧舉

永隆二年

辛巳

三月丙午皇太子親行釋奠禮

舊書本紀

八月詔曰學者立身之本文者經國之資豈可假以虛名必須徵其實效如聞明經射策不讀正經鈔撮義條纔有數卷進士不尋史傳惟誦舊策共相模擬本無實才所司考試之日曾不簡練因循舊例以分數爲限至於不辨章句未涉文詞者以人數未充皆聽及第其中亦有明經學業該深者惟許通六進士文理華贍者竟無甲科銓綜藝能遂無優劣試官又加顏面或容假手更相屬請莫憚糾繩由是僥倖路開文儒漸廢興廉舉孝因此失人簡賢任能無方可致自今已後考功試人明經試帖取十帖得六已上者會要作明經每經進士試雜文兩首按雜文兩首謂箴銘論表之類開元間始以賦居其帖十得六已上者

一或以詩居其一亦有全用詩賦者非定制也雜文之專用詩賦當在天寶之季 識文律者然後並令試

策仍嚴加捉搦必材藝灼然合昇高第者並即依令其明法并書

算貢舉人亦量準此例即為常式 冊府元龜 唐會要 唐大詔

立高宗時遷考功員外郎始奏請明經加帖進士試雜文自思立

始也唐語林云劉思立以進士惟試時務策恐復傷膚淺請加試

雜文兩道並帖小經是因思立之奏故下此詔

九月乙丑改永隆二年為開耀元年 舊書本紀

進士一人 按一人疑有誤 姜晞 唐詩紀事晞登永隆二年進士第 李父 舊書本傳本名尚真少與

兄尚一尚真俱以文章見稱舉進士 蘇頲李父神道碑公諱父

字尚真趙房子人柏人侯曇裔孫侍郎書勁十一世孫曾祖彥博

祖惠明父大智公十一從學極奧研幾十二屬詞台商咀徵中書

令薛元超謂人曰此子必負海內盛名十九郡舉茂才策第考功

郎劉思立一見又如之調補潞州壺關婺州武義尉以開元四年卒年六十推之年十九當上元二年其間數年不貢舉而劉思立於是年知舉蓋上元二年舉於州是年方登第

第

新書本傳作茂才異等累調萬年尉

應制及第

陳該

陳子昂陳該石人銘開耀元年制舉太子舍人司議郎大府少卿元知讓應制薦君於朝堂對

策高第勅授隆

州蒼溪縣主簿

知貢舉

劉思立

唐會要調露二年四月劉思立除考功員外郎蓋知次年之舉故唐語林封氏聞見錄皆載於

開耀

元年

開耀二年

壬午

二月癸未改開耀二年為永淳元年

舊書本紀

進士五十五人

撫言引作五十一人

重試及第十一

許且

狀

陳子昂

唐才子傳陳子昂字伯玉梓州人開耀二年許且榜進士按永樂大典引潼川志陳子昂文明初舉進士又趙儻故拾遺陳公旌德之碑亦云子昂年二十四文明元年進士與才子傳異考碑言射策高第在高宗崩之前當以才子傳為是盧藏用陳子昂別傳年二十一始東入咸京遊太學由是為遠進所籍甚以進士對策高第 雍思泰一人內雍思泰一人鄉貢 劉知幾舊書劉子元傳本名知幾楚州刺史允之族孫也新貢 劉知幾書父藏器舊書知幾少與兄知柔俱以詞學知名弱冠舉進士按子元卒在開元九年年六十一開耀元年二十惟其年進士一人故載是耳

知貢舉

劉思立

撫言作思元蓋思立之誤

永淳二年

癸未

三月勅令應詔舉人並試策三道即為永例

唐書元龜會要

七月庚申詔以今年十月有事於嵩岳仍令天下岳牧及京官五

品以上各舉所知有孝行儒學文武之士尋以帝不豫改用來年

正月行封禪之禮

冊府元龜 舊書本紀時天后自封岱之後勸上封中岳每下詔草儀注卽歲饑邊事警急而

止至是復行封中

岳禮上疾而止

十一月丙戌詔來年正月封中岳者宜停

冊府元龜

十二月己酉詔改永淳二年爲宏道元年是夕帝崩於貞觀殿

舊書

本紀

甲子中宗卽位尊天后爲皇太后政事咸取決焉

通鑑

進士五十五人

元求仁

撫言永淳二年五十五人內元求仁一人鄉貢

知貢舉 劉廷奇

見撫言

南菁書院叢書

登科記考卷三

大興徐松

唐則天順聖皇后

嗣聖元年

正月甲申朔改元嗣聖

舊書本紀 通鑑注此太子卽位踰年所改之元也

二月廢中宗爲廬陵王立豫王旦爲皇帝改元文明

通鑑

九月甲寅改元光宅元年大赦天下制曰濟時之道求賢是務其

官人及百姓等或器標瑚璉材堪棟榦或在職清慎或抱德幽棲

或武藝馳聲或文藻流譽宜令京官九品以上諸州長官各舉一

人咸以名薦務取得賢之實無貽濫吹之譏

冊府元龜 唐大詔令集

改國子監爲成均監

唐會要

策詞標文苑科問朕聞北辰端展貯衆彥以經邦南面居尊俟羣材而緯俗是知九官分職薰風之詠載敷八元匡朝就日之規方遠歷選列辟遐考前修並建明敷之躋式廣旁求之義故康衢扣角授相越於齊班海上牧羊封侯超於漢秩洎乎瀛風陵替雅道湮沈仕必因基官非材進官雖備職位匪得人遂使七輔之材銷聲於巖穴六佐之彥晦跡於邱園寤寐以之載勞虛佇今欲革因循之弊躡稽古之蹤此志雖勤其途未遂爲是旌賁爽於前代英雄寡於今晨伋爾昌言朕將親覽

文苑英華原注光宅元年

是年陳子昂上疏曰臣竊獨有私恨者惟陛下之欲興崇大化而不知國家太學之廢積歲月久矣學堂荒穢畧無人蹤詩書禮樂罕聞習者陛下明詔尚未及之愚臣所以私恨也臣聞天子立太學所以聚天下賢英爲政教之首君臣上下之禮於是興焉揖讓尊俎之節於此生焉是以天子得賢臣由此也今則荒廢失之於本而求之於末豈可得哉君子三年不爲禮禮必壞三年不爲樂樂必曠奈何天子之政而輕禮樂哉陛下何不詔太子胄子使歸太學而習業乎斯亦國家之大務也

冊府元龜

進士十六人

撫言光宅元年閏五月二十四日劉廷奇重試一十六人內康庭芝一人鄉貢是此年進士不止此數重

試及第者
十六人也

康庭芝

見上

鄭繇

唐詩紀事繇鄭州人
登嗣聖元年進士第

諸科併上書拜官九人

知貢舉

劉廷奇

見上

抱儒素科

雲麓漫鈔曰或抱德幽棲蓋卽是科也

按是年改元赦制

韜鈴科

雲麓漫鈔曰或武藝馳聲蓋卽是科也

郭敬之

舊書郭子儀傳父敬之顏真卿

郭公廟碑銘敬之弱冠以鄉邦之賦驟膺將帥之舉四擢高第有聲按敬之以天寶三年卒年七十八是年十八歲所謂將帥舉卽

登韜鈴科也永昌元年亦有韜鈴科敬之蓋聯登上第矣

詞標文苑科

文苑英華注光宅元年冊府元龜載垂拱四年十月是年改元赦制有文藻流譽今從英華

房

晉

見冊府元龜唐會要

皇甫伯瓊

見冊府元龜唐會要按文苑英華作皇甫瓊引登科記作皇甫伯瓊

王旦

見冊府元龜唐會要

房晉對策曰惟德動天大雲開其五色惟賢濟俗大運符其半千
是知廣廈將崇必仁羣材之用巨川方濟良資舟楫之功俾作股
肱方之羽翼自風姜御辨之始樹以后王君公雲鳥分司之初承
以大夫師長莫不投竿入相捨築稱師五臣光就日之朝八凱翊
薰風之代陰陽由其變理百姓用以平康善佐必資於賢臣輔國
或仁於良佐國家旁求俊乂束帛之禮薦陳物色異人邱園之彥
咸萃登壇對楚連城之寶不足稱置館求燕照乘之珍無以貴多
士邁隆周之日得人光炎漢之朝猶以爲官匪材升仕因基進顯

革因循之弊用追稽古之風誠願察彼山苗之詞求夫縱壑之論
材或可紀超升於槐棘之班德或可褒擢任於公卿之位開其上
賓之路頌以中和之詩則瀉于髡之進賢一朝而見七士許子將
之舉德少選而收二俊自然詞人闊步才子長鳴公理息昌言之

篇節信罷潛夫之作謹對

文苑
英華

皇甫伯瓊對策曰珠衡上列聖人居曜魄之尊玉理旁融元后握
乾坤之柄膺寶厯而推五勝皇綱居混沌之先懸玉鏡而連三千
帝系出氛氲之上莫不闢天關以統業橫地軸而開基象列宿而
環北辰制諸侯而嚮南面柱州巢氏之際晦聲迹於龍圖結繩鍊

石之餘摘景曜於龜象未有巨川已濟不資舟楫之功大厦已成
不假棟梁之力至於遶電流祉旣委任於三台就日居尊亦僉謀
於四岳道德爲富魏文侯之式廬禮義可尊燕昭王之擁簪孔明
佐蜀叶魚水以陳謀仲父相齊假鴻毛以康俗泊羸暉掩鏡漢道
亡珠位以恩升榮非德進挂網羅者則黃鵠高飛縻爵祿者則青
鳬競至自欽明撫運憲章稽古司光鳳紀位映龍名振鷺來儀翼
憲飈而鼓舞白駒萃止食場苗以繫維所以繩準百王牢籠萬代
伏惟聖母皇帝陛下闢陰陽之二氣獨化初皇啓日月之三光混
成太極靈祇翕忽出震宮而齊巽圍雲雨氤氲辨天垓而通地圻

慕崩沙之靈運符閨石之休期憂在進賢道叶採苓之化恩無不
逮德合樛木之風掩媧后以稱尊邁姬任而莅政吹塵釣璜之侶
接武於堦墀騎星弄電之夫肩隨於廊廟雖良駿充廐逾懷買骨
之謀真龍在堂更伉丹青之翫應休璉之獨坐鳥雀來庭尹叔良
之閑居蠨蛸在戶傍加策問親覽政途詞麗汾川聲侔沛邑掩鵬
圖而該魏網漆園無控地之詞飛鶴板而徵漢臣九皋有聞天之
譽凡曰羣生孰不幸甚臣中庸賤逸下澤幽微忝預明敎謬承推
擇馳心日路冀三捨以矜魂累息天門瞻九重而惕慮謹對聞

苑文

英華

光宅二年

乙酉

正月丁未改元垂拱元年

舊書本紀

三月丙辰遷廬陵王哲於房州

舊書本紀

五月詔内外文武九品以上及百姓咸令自舉

舊書本紀 文苑英華載求賢制曰

鸞臺朕聞璧月珠星實爲麗天之像蒼波翠岳爰標紀地之形是知正位辨方體元建極不憑羣彥孰贊皇猷事總萬幾心單億兆恒靡違於寢食誠周憚於憂勤仁賢良則終宵失寢詢正道則竟日停餐豈直未明求衣夙忘食而已比者屢垂旌帛頻訪邱園雖志切於旁求然未逢於俊乂待舟航而涉水思羽翼而凌虛今者更啟搜揚庶得不遺草澤其有文可以經邦國武可以定邊疆蘊梁棟之宏才堪將相之重任無隔士庶具以名聞若舉得其人必當擢以不次如妄相推薦亦實科繩所冀多士襲於隆周得人踰於盛漢布告遐邇知朕意焉按此制年月不可考景雲二年有又可以經邦國科然鸞臺之稱自神龍元年已改則非景雲詔書

登科記考

卷三

五

明矣故載於
此以俟考

策進士問欲使吏潔冰霜俗忘貪鄙家給人足禮備樂和庠序交
與農桑競勸善師期於不陣上將先於伐謀未待干戈遽清金庭
之祿無勞轉運長銷玉塞之塵利國安邊仁聞良算明言政要朕
將親覽

第一道

問朕聞運海搏扶必籍垂天之羽乘流擊汰必仁

飛雲之概是知席蘿黃屋握鏡紫微誠資獻替之功必待弼諧之
助所以軒轅撫運遂感大風之祥伊帝乘時遽致秋雲之兆朕雖
慚古烈而情切上皇未校滋泉之占猶虛傳野之夢欲使歲星入
仕風伯來朝河薦蕭張之名山降申甫之佐垂衣仁化端拱仰成

多士溢於周朝得人過於漢日行何政道可以至斯思聞進善之言以副求賢之旨

第二道

問朕聞明王闡化化感人靈之心聖后

宣風風移動植之性遂使翔龍薦檢鳴鳳司農獸解觸邪草能指倭仰惟前烈何德而臻此乎朕迭聽遂初載欽神化每欲反斯筦薄景彼上皇欲使瑞筵司庖仙冀候月遊四靈於翠苑集五老於滎河致此休徵良由政感仁聞啟沃以副虛襟

第三道

問朕聞三

微遞代哲后所以承天五運因循明王由之革命或金水而鱗次應火木以還周或寅子變正天人之統斯辨驪駟改色昏旦之用有殊茲乃渙汗圖書昭彰歷數受位出震以迄於今莫不母子相

承終始交際然而都君土德翻乃尚青天乙水行寧宜用白深明
要旨其義何從若以秦氏霸基便有符於紫色則魏人鼎足豈復
應於黃星緬鏡前修又以矛盾張蒼之議既頗反於公孫賈傳之
談復遠乖於劉向子大夫學包羣玉文擅鏘金既聽南史之篇方
伋東堂之問詳敷事實靡得浮詞商榷前儒誰爲折衷

第四道

問

朕以紫極暇景青史散懷眇尋開闢之源遐覽帝王之道或載紀
邈邈無其處而有其名或墳籍喪亡有其號而無其事將求故實
以伋多聞至如化被桂州創基刑馬兩代之事誰遠五德之運何
承石樓之都見匪均霜之地窮桑之壤元非測景之區時將城彼

偏方惟一隅而獨王輕茲中土棄九洛而不營大夏之時化臻禁
甲隆周之日道致翰戈而七十一征翻在鳳凰之運五十二戰更
屬雲官之期斯則偃伯之人無聞於太古摧鋒之弊反息於中葉
澆淳之道名實何乖欲令歷選前聖遠稽上德採文質之令猷求
損益之折衷何君可以爲師範何代可以取規繩遲爾昌言以沃

虛想

第五道 文苑英華 按文苑英華載此爲賢良方正
策是時制舉策祇三道進士則五道英華誤也今改正

進士二十二入再取五人

此與摭言所載二十七人之數適合登
科記又載嗣聖二年進士十三人重試

三十六人光宅二年進士五十九人按嗣聖二年光宅二年卽垂
拱元年也登科記誤今不取 是年雜文試題爲九河銘高松賦
見 吳師道 狀元見玉芝堂談薈 文苑英華注一作吳道古
下 摭言吳師道等二十七人及第勅批云畧觀其策並

未盡善若依令式及第者惟祇一人

顏元孫

舊書忠義傳顏元孫垂拱初登進士

意欲廣收其才通三者並許及第

顏真卿顏

元孫神道碑君諱元孫字聿修京兆長安人舉進士素未習尚書

六日而兼注必究省試九河銘高松賦故事舉人就試朝官畢集

考功郎劉奇乃先標榜君日銘賦二首既麗且新時務五條詞高

理贍惜其帖經通六所以不與屈從常第徒深

悚作由是名動天下按劉奇當作劉廷奇

明經科

張嘉貞

舊書本傳蒲州猗氏人弱冠應五經舉以開元十七年卒年六十四推之是年二十歲

李尙隱

舊書良吏傳李尙隱弱冠明經以開元二十八年七十五推之是年二十歲

知貢舉

劉廷奇

見上

吳師道對策曰臣聞棲培塿者不覩嵩泰之干雲遊流滂者詎識

滄溟之沃日臣蒿萊弱質衡泌鰥生未識廣廈之居安知太牢之

味不量最爾輕從褒然謬達天聰兢惶聖問粵惟皇家出震累葉
重輝天人歸七百之期宗祏聯億兆之慶太宗以明一察道括珠
囊而總萬方高宗以通三御宸轉金鏡而清九服用能肅清天步
夷坦帝途垂莫大之鴻基託非常之元聖伏惟皇太后陛下道超
鍊石化軼捫天被子育之深仁宏母儀之博愛星階已正尚雖休
而勿休宸極旣安猶損之而又損方欲還淳返樸振三古之頽風
緝正蒼生降四海之昌運拔幽滯舉賢良黜讒邪進忠諫故得鴻
禧接軫和宇宙之陰陽龍武分曹節風雨之春夏禮樂備舉學校
如林俗知廉讓之風人悅農桑之勸猶復旁求設議虛伋芻蕘旣

屬對敷敢陳庸警誠願察洗幘布衣之士任以台衡擢委金議玉
之夫居其令守則俗忘貪鄙吏潔冰霜矣旌好學之流賞力田之
伍則家寒貧情位列文儒矣降通親之使喻彼臬心發和戎之官
收其雞肋則四夷左衽顛倒來王三邊元惡誦謠仰化矣自然龍
義駕昊六五帝而四三皇遠肅邇安飛英聲而騰茂實謹對

第一道

臣聞立極膺乾之君當仁御坤之主欲臻至道將隆景化莫不
旁求俊彥廣命英奇疑庶績以安人綏萬邦而撫俗是故軒邱磨
錄委四監以垂衣丹陵握圖舉八元而光宅於是齊桓擬之於飛
翼殷武興之以葵梅克贊人謀實宣神化陛下功包遠古道逸上

皇受授惟明謀謨克序弼輔之任總風力於前驅燮理之司列伊
周於後乘振鷺翔鸞之客畢奏天階乘箕降昴之英咸趨日路且
猶虚心卜兆託想旁求冀山谷之無遺庶賢良之畢萃俯訪愚魯
敢述明敷誠願發德音下明詔咨列嶽訪羣公舉爾所知不遺於
側陋知人不易無輕於慎擇下僚必錄上賞頻霑則葉縣游龍自
九天而下降燕郊駿馬赴千金而遙集漢末爲得周豈能多盡善
盡美於斯爲盛謹對

第二道

臣聞化洽乾樞景緯呈其靈貺澤周

坤絡卉木效其禎祥是以若霧非烟必應文明之后九莖三秀允
符光宅之君陛下應期納籙撫運登皇孝道格於元穹仁心光於

紫極自臨萬域輯御羣方靈瑞屢臻休徵荐至五蹄仁獸樂君囿
而來遊六象威禽拂帝梧而萃止豈直銀黃玉紫雉白馬丹翻鄙
上之二桴拔江間之三脊固亦巡河受檢拜洛披圖降五老於星
躔歸四神於雲路盛矣美矣魏乎煥乎躡三五以騰徽吞八九而
高視尙且崇謙讓之道守沖撝之德抑斯天瑞訪此人謀陛下雖
不宰其成功微臣亦不知其所謂謹對

第三道

臣聞方圓既闕帝

王斯建四遊將六氣交馳五德與三微遞變白攝提著紀出震登
皇循木火而相承用驪驪而繼作雖復武功文德揖讓干戈御旒
辰以高居握圖錄而深視莫不垂天人之統順寅子之正始終之

際何莫由斯暨乎運偶都君時云土德道鍾天乙數叶水行子勝
母而尙青母生金而尙白畧言其美斯窮奧旨至若秦居閭位紫
實非正之符魏得中區黃標應星之紀未有矛盾允愜隨時漢祖
承天人多異議張蒼言水而黑時方興公孫據土而黃龍復應逮
二劉之父子推五運之相沿較彼前談斯爲折衷臣學非博古識
昧知新輕陳管穴之窺猥奉天人之問慚惶靡地悚越兼深謹對

第四道

臣聞一剖爲三始鴻濛於太易九變於七漸茫昧於無爲
旣分清濁之儀乃列君臣之位則有天皇首出瞰柱州而宅土地
皇革命俯刑焉以開都年匪異於萬八千號稍殊於七十二旣云

木德亦曰火行開於天地之初錄自帝皇之紀至若石樓遠界窮
桑延壤非萬邦之土中爲二代之天邑斯乃時猶驚飲道尚鶉居
誰知風雨之均能建皇王之宅亦分長於九域豈獨王於偏方乃
觀象垂衣化穆羲軒之代翦商伐扈人澆周夏之年而皇德方隆
未弭戰爭之患王道纔著復存韜似之日是則懷柔伐叛取亂侮
亡雖鍾大道之行終仁勝殘之戰是故劣於太古非事優於中代
陛下選芳列辟垂範千年王化旣平能事斯畢亦何必損益今辰
之政師謨往帝之規撫和琴而促柱御夷途而止轍因循勿失臣

謂其宜謹對

第五道
文苑英華

垂拱二年 丙戌

進士四人

三年 丁亥

進士六十五人

陳伯玉

狀元見玉
芝堂談薈

四年 戊子

十二月策詞標文苑科問朕聞立極開基之主經文緯武之君莫
不象法殊流汚隆異制至於安人導俗咸卽運以垂芳緝化宣風
各因時而播美是以道孚繩木爰膺九翼之年圖秘龜龍用啟六
爻之代窮桑御歷狎威風以分司軒后列位因景雲而命職徵汾

陽之跡則十政方凝俯河濱之化則四門攸闢祥披玉斗理九土
以興功祚徒金精調五聲而作教周崇六禮仁義之道爲先漢設
三章王霸之圖斯雜皆所以牢籠八際彙括三靈齊四大以居尊
叶五神而稱正且隨時之義既不相沿師古之言又聞前誥朕欽
承先聖對越上元當二興懷真切推薄之慮凝旒結想方深馭朽
之情思所以式展鴻猷勉庶績而撫茲薄德昧此永圖爾等積
學多聞含章獨秀未顯疇庸之德宜申待扣之音隨時之務何先
經國之圖何取帝皇之道奚是王霸之理奚非仁聽良謨朕將親
覽

道第一

問朕聞禮崇三典方宏慎罰之規書著五刑不以深文

爲義朕母臨赤縣子育黔黎夏日貽憂懼青牛之結氣秋荼軫念
慮丹筆之成冤然以人尙掛於湯羅情倍深於禹泣頃者荆郊起
祲淮甸興祆朕惟罪彼元凶餘黨並從寬宥今敬貞之輩猶蘊狼
心不荷再生之恩重構三藩之逆還嬰巨釁便犯嚴科豈止殺之
方乖於折衷將小慈之澤爽彼大猷子大夫等學富三冬才高十
室刑政之要實所明閑傾此虛襟仁聞良說第二道問朕聞仰觀
乾象房心爲布政之宮俯察坤元河洛建受圖之所是以上稽珠
緯得風雨之和下表主暉均遠近之節定都考室斯焉是崇願以
庸虛謬膺大寶乾乾夕惕每軫納隍之懷栗栗宵興恆勞馭朽之

念而昊穹眷命靈貺屢彰雲構旣隆天城斯畢是用內省多愧上
答愈勤將欲殷薦有常嚴配不墜光啟惟新之躋申明祀典之方
順四時以布和風考五物以作正氣盛禮之要猶慮未宏爾等並
積學基身含章表質或遠從賓薦聲滿於州閭或遐應搜揚譽光
於朝選採皇王之奧旨援周漢之前蹤蘊彼胸襟咸應備曉未知
何代之政參酌適中何禮之規施用爲切務從必簡之道式崇可
久之基試陳嘉謀爾其揚榘思擢太常之第副朕求賢之懷

第三道

文苑英華
張燕公集

進士二十四人

明經科

尹守貞

張說四門助教尹先生墓誌銘先生諱守貞天水冀人垂拱四年以明經高第

諸科三十人

裴耀卿

新書本傳耀卿字煥之舊書本傳贈戶部尚書守貞子也少聰敏數歲解屬文童子

舉

孫逸裴公德政頌耀卿河東聞喜人八歲神童擢第王維裴僕射遺愛碑入歲神童舉試毛詩尚書論語及第以天寶二載

年六十三推之應舉在是年

詞標文苑科

古今科

張說

舊書本傳弱冠應詔舉對策乙第新書本傳武后策賢良方正更

部尚書李景諶糊名較覆說對第一

后署乙等

大唐新語則天

初革命大搜遺逸四方之士應制者向萬人則天御維陽城南門

親自臨試張說對策為天下第一則天以近古以來未有甲科乃

屈為第二等其警句曰昔三監玩常有司既糾之以猛今四罪咸

服陛下宜濟之以寬拜太子校書仍令寫策本於尚書省頒示朝

集及蕃客等以光大國得賢之美劉禹錫韋處厚集序天后朝

燕國張公說以詞標文苑徵唐才子傳張說字道濟洛陽人垂

拱四年舉學綜古今科授太子校書記纂淵海引登科記永昌

九年應學綜古今科一人張說第三等考策日封進今日洛陽人張說文詞清典藝能優裕金門對策已居高科之首銀榜効官且加一命之秩按諸書所引或曰賢良方正或曰詞標文苑或曰學綜古今實止一科也說卒於開元十八年年六十四是年二十二故曰陳該陳子昂陳該石人銘垂拱四年又應制學弱冠陳該綜古今對策高第勅授懷州河內縣尉

張說對策曰臣聞舜命昌言漢徵極諫嘗覽千古賢哉二君今陛下發德音下明詔選空巖穴訪市與臺大哉邈乎過之遠矣臣以草莽之賤謬當車乘之招誠不足以庶幾王庭充塞大問伏讀聖旨乃知天情之所在焉臣聞昔者鳥跡代繩龜文演卦水土遷王時更萬祀金木互興人非一姓暨乎三皇五帝氏往夏商周漢氏作或導人以禮樂或驅俗以刑政或革弊以敬忠或沿風以文武

非師古之誥有殊蓋隨時之義且異也伏惟聖母神皇陛下誕夢
鴻基光膺駿命粵若立極格天之業論道布政之典任賢克暴之
功出洛飛雲之瑞此並藏緯玉冊敕休金版鬱映於前古揚光於
後業者矣至於創業垂統之則宏猷永圖之義重光三聖載清六
合可不謂然乎猶或惕慮推溝勞謙馭朽謝文明於薄德想疇庸
於清問此陛下之至讓也愚臣何足以知之策曰適時之務何先
經國之圖何取臣聞古者因人以立法乘時以設教以義制事以
禮制心夫人者理得則氣和業安則心固崇讓則不競知恥則遠
刑若強人之所不能雖令不勸禁人之所必犯雖罰必違故曰政

不欲煩煩則數數則政無定人懷苟免之心網不欲密密則巧巧則文多傷下有非辜之懼竊見今之俗吏或匪正人以刻爲明以苛爲察以剝下爲利以附上爲誠綜覈之詞考課專於刀筆撫字之宰職務具於簿書陛下日昃雖勤守宰風化多闕臣以爲將行美政必先擇人失政謂之虐人失人謂之傷政捨人爲政雖勤何爲伏願陛下進經術之士退掊克之吏崇簡易之化流愷弟之風畫一成歌此適時之務也慎賢而用此經國之圖也苟能英才不棄大化方隆而猶曰朝謝垂衣野非擊壤則文武之道尙何言哉堯舜之君徒虛語耳策曰帝皇之道奚是王霸之理奚非者布在

方策臣聞之矣聖人御歷上瀉而下信帝者膺期君明而臣哲周用王道教化一而人從漢雜霸道刑政嚴而俗僞故親譽優於畏侮文景劣於成康謹對道第一

臣聞刑以助教德以閑邪先王慎於好生大易誠於緩死今陛下母臨黔首子育蒼生孚佑下人克配上帝然有東南小侵荆蠻遠郊雖聖德泣辜上用防風之戮天心罪已仍勞淮甸之師其有挂誤閭閻脅從井邑陛下愍孤嫠於海淮恤困窮於江漢捨從寬宥此陛下之恩也而最爾餘孽蠢茲頑兇思弄兵於漢地之下將構釁於戎狄之城罪盈稔貫禍得萌芽此又陛下之明也今陛下乃賜臣策曰豈止殺之方乖於折衷

將小慈之澤爽彼大猷臣實見折衷大猷之規不知小乖微爽之義也策曰刑政之要實所明閑臣聞政同水火刑譬陰陽頃者三監亂常有司旣糾之以猛於今四罪咸服陛下宜濟之以寬明肆赦之渥恩安萬人之反側布深仁於羅鳥收至察於泉魚豈不大哉天下幸甚且夫人者叱也暗而不可罔庶者衆也愚而不可欺是以刑在必澄不在必慘政在必信不在必苛故明王之理天下也刑一則人畏而不干政簡則俗齊而不僞於是禍亂不作災害不生君安於上臣悅於下百姓日用不知其然四海風動惟帝之則道暢鍾石聲流舞詠其行己也非他所理者以此刑政之要庶

幾一隅謹對

第二道

伏惟陛下則天法地畏命重人據河洛之規

模總風雨之交會軒后魚圖之水建邦設都周公龜墨之地考堂
作室靈祇降福嘉祥薦祉制同神造力以子來將以殷薦上帝至
德也嚴配先王至孝也是以八風攸序四時克諧無得而稱能事
畢矣猶復執勞謙之不已懼盛德之未宏訪末學之臣詢稽古之
政斯事體大臣何足言然不敢不欽承以竭涓滴耳策曰何代之
政參詳適中何禮之規施用爲切臣謹錯綜三五明徵典墳竊以
緯武經文布方策而非遠英風顯號流頌聲而可襲未有反義背
德而至昇平之政棄古違今以克永終之祿莫不發號施令法乾

坤而動靜執契懸衡順金木之刑德是故青陽元室遵季孟而觀
風白輅朱旗乘離兌而布政養老用上庠之禮教胄取大學之義
環水著辟雍之名嚮陽表明堂之位蓋所以高羣瑞朝諸侯班正
朔調景緯成簡易之業崇久大之基也皇王奧育庶此詳探周漢
前蹤固難守用臣才智驚劣草莽鯁生至如軍國務廣政刑理急
但至敬無文信言不美陛下欲聽其說必觀於事將逆其謀先求
諸道危言抵禁破膽寒心伏惟聖主稽留天聽謹對
燕公
第三道
苑英華
張

永昌元年

己丑

正月乙卯改元

舊唐本紀

六月詔曰鸞臺上之臨下道莫貴於求賢臣之事君功豈踰於進善所以允凝庶績式靜羣方成大厦之凌雲濟巨川之沃日故周稱多士著美風謠漢號得人垂芳竹素歷觀前代罔不由茲朕雖宵分輟寢日旰忘食勉思政術不憚劬勞而九域之至廣豈一人之獨化必伋材能共成羽翼雖復羣龍在位振鷺充庭仍恐屠釣或違邁軸尚隱未殫巖穴之美或委邱園之秀所以屢迴旌帛頻遣搜揚推薦之道相尋而虛伋之懷未愜永言於此寤寐以之宜令文武官五品以上各舉所知其有抱梁棟之材可以丹青神化

蘊韜鈴之畧可以振耀天威資道德之方可以獎訓風俗踐孝友之行可以勸率生靈抱儒素之業可以師範國胄蓄文藻之思可以方駕詞人守貞亮之節可以直言無隱履清白之操可以守職不渝凡此八科實該三道取人以器求才務適所司仍具爲限程副朕意焉主者施行

文苑英華

策賢良方正科曰問朕聞體國經野取則於天文設官分職用力於人紀名實相副自古稱難則哲之方深所不易朕以薄德謬荷昌圖思欲追逸軌於上皇拯羣生於季俗澄源正本式啟惟新俾用才委能靡失其序以事効力各得其長至於考課之方猶迷於

去取黜陟之義尙惑於古今未知何帝之法制可遵何代之沿革
可衷此雖芟芟束帛每責於邱園翹翹錯薪未獲於英楚並何方
啟塞以致於茲仁爾深謀朕將親覽

第一道

問朕聞軌物垂訓必

隨正於因生開國承家理崇光於敦本故七葉貂珥表金室之榮
十紀羽儀峻班門之躅保姓受氏義先於睦親翼子謀孫事隆於
長發朕以寡昧叨奉先靈墜典咸新遺章必覩思欲甄明譜系澄
汰簪居派別淄澠區分士庶至如陳田互出虢郭俱開束皙改漢
傳之宗輔果易晉卿之號巨君之姓曾非馭鶴之苗元海之家諒
非擾龍之族永言紕謬良用憮然子大夫十室推英三冬富學允

迪褒然之舉宜揚鏘爾之詞至若北郭南宮本因何義三鳥五鹿起自何人公孫之由司馬之姓咸加辨析且顯指歸式副對揚朕

將親覽

第二道
文英華集

進士神都六人西京二人

按撫言以兩都貢舉始於永泰元年者誤

諸科一人

賢良方正科

張柬之

舊書本傳進士擢第累補青城丞永昌元年以賢良徵試同時對策者千餘人柬之

獨爲當時第一

太平廣記

引定命錄張柬之任青城縣丞已六

十三矣有善相者云後當位極人臣衆莫之信後應制策彼落則

天怪中第人少令於所落人中更揀有司奏一人策好綴書寫不

中程律故退則天覽之以爲奇才召入問策中事特異之卽上第

拜王屋縣尉

大唐新語永昌初張柬之應制策試畢有傳柬之

考入下課者柬之嘆曰余之命也乃委歸襄陽時中書舍人劉允

齊書考自下第昇

甲科為天下第一

秘書郎當亦賢

良方正科也

元泰字履貞永昌元年舉茂才對策第三拜內校文章博

士遷瀛州刺史

明堂大禮科

趙徵冲

即說趙徵冲神道碑云天后時應明堂大禮科上異其對授陝州陝縣尉按武后

享明堂在是年

張柬之對策曰臣聞仲尼之作春秋也法五始之要正王道之端

微顯闡幽昭隆大業渥洛之功既備範圍之理亦深伏惟陛下受

天明命統輯黎元載黃屋負黼展居紫宮之邃坐明堂之上順陽

和以布政攝三吏而論道雍容高拱金聲玉振徵求無厭誤及斯

賤微臣材朽學淺誠不足以膺嚴旨揚天休雖然敢不盡芻蕘
狂瞽悉心竭節昧死上對臣聞天者羣物之祖王者受命於天故
則天而布列職天生蒸人樹之君長以司牧之自非聰明睿哲濟
聖廣深不能使人樂其生家安其業陛下德自天縱慈憫元元既
樂其生且安其業臣聞瑞者上天所以申命人主也故使麒麟遊
於囿鳳皇集於庭慶雲出神龍見其餘草木烟露之祥不可勝紀
陛下日慎一日雖休勿休故天申之以禎石告之以神文大矣哉
聖人之鴻業也臣聞河圖洛書之不至也久矣孔子曰鳳鳥不至
河不出圖吾已矣夫師說曰聖人自傷已有能致之資而天不致

也陛下有能致之資而天蘊者所以扶助聖德撫寧兆人也臣觀
今朝廷含章瞻博之士鯁言正議之臣陛下誘而進之並踐丹地
伏青規顙顙昂昂雲屬霧委鸞翥鳳振佩金鳴玉曳珠紱揚翠綏
充初於階庭者矣昔舜舉十六相去四凶人有大功二十而爲天
子前史美之稱曰盡善盡美雖甚盛德無以加此陛下彰善去惡
昭德塞違萬萬於虞舜自託薄德愚臣何足以望清光而敢有議
哉制策曰思欲追逸軌於上皇拯羣生於季俗澄源正本式啟惟
新臣聞善言古者必考之於今善談今者必求之於古臣竊以當
今之務而稽之往古以往古之跡而比之當今以爲三皇神聖其

臣不能及故於

闕

見之陛下刊列格正爰書修本業著新誠建總

章以申嚴配置法匭以濟窮冤此前聖所不能爲非羣臣之所及也今朝廷之政上令下行如身之使臂臂之使手百僚師師罔不咸乂此羣臣之所能奉職也書曰元首明哉股肱良哉庶事康哉故臣以爲陛下有三皇之位而能隆三皇之業也臣以今之刺史古之十二牧也今之縣令古之百里君也有官聯焉有社稷焉可謂重矣任非其材其害亦重矣昔周宣王欲訓其人問於樊仲曰吾欲訓人諸侯誰可者仲曰魯侯肅恭明神敬事耆老必咨於故實問於遺訓乃立之晉之名臣亦言舍人洗馬一時之高選臺郎

御史萬邦之俊哲若出於宰牧頌聲興矣由此言之則古牧州宰縣者不易其人也自非惠訓不倦動簡天心者未可委以五符之重百里之寄今則不然多矣門資擢授或以勅階泣職莫計清濁無選藝能負違聖誠安肯肅恭明神經理慢法安肯敬事耆老取捨自便安能求之故實舉錯縱欲安能問之遺訓異一時之高材非萬邦之俊傑欲是多其僕妾廣其資產齒角兩兼足翼雙備跼瑕履穢不顧廉恥抵網觸羅覆車相次孔子曰既得之患失之苟患失之無所不至矣故臣以爲陛下有三皇之人無三皇之吏也制策曰俾用才委能靡失其序以事効力各得其長至於考課之

方猶迷於去取黜陟之義尙惑於古今未知何帝之法制可遵何代之沿革斯衷臣聞皇王之制殊條其貫雖有改制之名無不相因而立事孔子曰殷因於夏禮所損益可知也周因於殷禮所損益可知也其或繼周者雖百代可知也然則虞帝之三考黜陟周王之六廉察士雖有沿革所取不殊期於不濫而已陛下取人之法甚明考績之規甚著臣以爲猶舟浮於水車轉於陸雖百王無易也今邱園已賁英楚雲集啟塞之路豈愚臣所能輕云也謹對

第一道

臣聞保姓受氏明乎典訓或因地以賜姓或因官而受氏或官以代功亦以官族或所居之地因以爲氏諸侯之子稱爲公

子公子之子稱爲公孫公孫之子乃以其王父字爲氏後代因之
亦以爲姓田陳虢郭以聲近而遂分輔果東皙以避難而更改王
莽以田王爲氏元海因漢甥立族騷括分南北之號充宗爲五鹿
之先應氏著書具表三烏之始司馬司徒是日因官公孫叔孫春
秋備載陛下盡六藝之英窮百代之要淑問揚天地元情貫幽顯
黃竹清歌詞窮五際白雲高唱文苞萬象昔曹門二祖道媿由庚
劉氏四葉仁非解慍豈若睿恩瓊敷同雨露之霑漸神機若發等
曦望之照臨起帝典而孤立孕皇墳而獨秀臣沐浴渥和叨承至

訓名聞於聖聽言奏於闕前謹對

第二道
文苑英華

載初元年

庚寅

正月庚辰改永昌元年十一月爲載初元年依周正建子月爲正

月

舊書本紀

二月辛酉

冊府元龜唐會要作二月十四日

太后策貢士於洛城殿

冊府元龜唐會要云數日

方貢士殿試自此始

通鑑

九月九日壬午革唐命改國號爲周改元爲天授

舊書本紀

令史務滋等十人分道存撫天下

舊書本紀

進士神都十二人西京四人

王珣

新書珣字伯玉與兄瑱弟瑒以文學稱天授初珣及進士

第

諸科五人

拔萃科

顏惟貞

顏貞卿惟貞碑天授元年糊名考試判入高等

著文藻之思科

彭景直

冊府元龜

抱儒素之業科

李文蔚

冊府元龜

唐會要作李文愿按冊府元龜載此兩科於永昌元年正月考

下詔在永昌元年六月故移入此年

天授二年

辛卯

進士十六年

英才傑出業與大經科

祝欽明

文獻通典引李巽嚴家有唐制舉科目圖一卷在天授中祝欽

明中英才傑出業與大經科

按新書祝欽明傳永淳天授間中英才傑出業與六經等科是六為六字之訛英才傑出與業與六

經亦非一科
也附此俟考

孝弟鯁直科

見雲麓漫鈔

三年壬辰

一月丁卯太后引見存撫使所舉人無問賢愚悉加擢用高者試鳳閣舍人給事中次試員外郎侍御史補闕拾遺校書郎時人爲之語曰補闕連車載拾遺平斗量櫻推侍御史盍脫校書郎有舉人沈全交續之日麴心存撫使昧目聖神皇爲御史紀先知所擒劾其誹謗朝政請杖之朝堂然後付法太后笑曰但使卿輩不濫何恤人言宜釋其罪

通鑑考異曰統紀天授二年十月十道舉人石艾縣令王山齡等六十人擢爲拾遺補

關懷州錄事參軍霍獻可等二十四人爲御史并州錄事參軍徐
所等二十四人爲著作佐郎及評事內黃尉崔宣道等二十三人
爲衛
佐

甲戌補闕薛謙光上疏曰臣聞國以得賢爲寶臣以舉士爲忠是
以子皮之讓國僑鮑叔之推管仲燕昭委兵於樂毅符堅託政於
王猛及子產受國人之謗夷吾貪其買之財昭王賜輅馬以止讒
永固戮樊世以除譖處猜嫌而益信行間毀而無疑此由識之至
而察之深也

舊書作此由默而識之委而察之深也

至若宰我見愚於仲尼逢萌被

知於文叔韓信無聞於項氏毛遂不齒於平原此失事之故也是
以人主愛不肖之士則政乖得賢良之佐則時泰故堯資八元而

庶績其理周任十亂則天下和平由是言之則知士不可不察而
官不可妄授也何者比來舉薦多不才假譽馳聲互相推獎希
潤身之小計忘臣子之大猷非所以報國求賢副陛下翹翹之望
者也臣竊窺古之取士實異於今先觀名行之源考其鄉邑之譽
崇禮讓以勵已明節義以標信以敦樸爲先最以雕蟲爲後科故
人崇勸讓之風士去輕浮之行希仕者必修貞確不拔之操行難
進易退之規眾議已定其高下郡將難誣於曲直故計貢之賢愚
卽州將之榮辱穢行之彰露亦鄉人之厚顏是以李陵降而隴西
慚千木隱而西河美名勝於利故小人之道消利勝於名則貪暴

之風扇是知化俗之本須擯輕浮昔冀缺以禮讓昇朝則晉人知
禮文翁以儒術化俗則蜀士崇儒燕昭好馬則駿馬來庭葉公好
龍則真龍入室由是言之未有上之所好而下不從其化者也自
七國之季雖雜縱橫而漢代求才猶徵百行是以禮節之士敏德
自修閭里推高然後爲府寺所辟魏氏取人尤愛放達晉宋之後
祇重門資將爲人求官之風乖授職惟賢之義有梁薦士雅好屬
詞陳氏簡賢特珍賦詠故其俗以詩酒爲重不以修身爲務逮至
隋室餘風尙存開皇中李諤論之於文帝曰魏之三祖更好文詞
忽君人之大道好雕蟲之小藝連篇累牘不出月露之形積案盈

箱惟是風雲之狀代俗以此相高朝廷以茲擇士故文筆日繁其
政日亂帝納李諤之策由是下制禁斷文筆之爲浮詞者其年泗
州刺史司馬幼之以表詞不典實得罪於是風俗改勵政化大行
煬帝嗣興又變前法置進士等科於是後生之徒復相倣效因陋
就寡赴速邀時緝綴小文名之策學不以指實爲本而以虛浮爲
貴有唐纂厯雖漸革於前非陛下君臨思察才於其理樹本崇化
惟在旌賢今之舉人有乖事實鄉議決小人之筆行修無長者之
論策第喧競於州府祈恩不勝於拜伏或明制纔出試遣搜敷則
馳驅府寺之門出入王公之第上啟陳詩惟希咳唾之澤摩頂至

足冀荷提携之恩故俗號舉人皆稱覓舉覓爲自求之意未是人知之辭察其行而度其材則人品於此見矣徇己之心切則至公之理乖貪仕之性彰則廉潔之風薄是知府命雖高異叔度勤勤之讓黃門已貴無秦嘉耿耿之詞縱不能抑己推賢亦不肖待於三命豈與夫白駒皎皎不雜風塵東帛茝茝榮高物表校量其廣狹也是以耿介之士羞自拔而致其辭循常之人捨其疏而取其附故選司補授喧然於禮闈州貢賓王爭訟於階闥謗議紛合浸以成風夫競榮者必有競利之心謙遜者亦無貪賄之累自非上智焉能不移在於中人理由習俗若重謹厚之士則懷祿者必崇

德以潔己若開趨競之門則邀仕者皆戚施而附會附會則百姓
罹其弊潔已則兆庶蒙其福故風化之漸靡不由茲今訪鄉閭之
談惟祇歸於里正縱使名虧禮則罪挂刑章或冒籍以偷資或邀
勳而竊級假其不義之賂卽是無犯鄉閭豈得比郭有道之銓量
茅容望重裴逸人之獎拔夏統名高語其優劣也祇如才應經邦
之流惟令試策武能致敵之例只驗鸞弧若其文登清奇便充甲
第藻思微減便卽告歸以此取人恐乖事實何者樂廣假筆於潘
岳靈運詞高於穆之平津文劣於長卿子建藻麗於荀彧若以射
策爲最則潘謝曹馬必居孫樂之右若使協贊機猷則安仁靈運

亦無裨附之益由此言之不可一概而取也至如武藝則趙雲雖
勇資諸葛之指搗周勃雖雄乏陳平之智略若使樊噲居蕭何之
任必失指縱之機使蕭何入戲下之軍亦無免主之效關將長於
摧鋒謀將審於料事是以文泉聚米知隗囂之可圖陳湯屈指識
烏孫之自解八難之謀設高祖追慚於酈生九拒之計窮公輸息
心於代宋謀將不長於弓矢良相不資於射策豈與夫元長自表
安飾詞鋒曹植題章虛飛麗藻較量其可否也伏願陛下降明制
頒峻科千里一賢尙不爲少僥倖國進須立隄防斷浮虛之飾詞
收實用之良策不取無稽之說必求忠讜之言文則試以效官武

則令其守禦始既察言觀行終亦循名責實自然僥倖濫吹之伍
無所藏其妄庸故晏嬰曰舉之以語考之以事寡其言而多其行
拙於文而工於事此取人得賢之道也其有武藝超絕文鋒挺秀
有效伎之偏用無經國之大才爲軍鋒之爪牙作詞賦之標準自
可試凌雲之策練穿札之工承上命而賦甘泉秉中軍而令赴敵
既有隨才之任必無負乘之憂臣謹按吳起臨戰左右進劒吳子
曰夫提鼓揮桴臨難決疑此將事也一劒之任非將事也謹按諸
葛亮臨戎不親戎服領蜀兵於渭南宣王持勁卒不敢當此豈弓
矢之用也謹按楊得意誦長卿之文武帝曰恨不與此人同時及

相如至終於文園令不以公卿之位處之者蓋非其所任故也謹
按漢法所舉之主終身保任揚雄之坐田儀責其冒薦成子之居
魏相酬於得賢賞罰之令行則請謁之心絕退讓之義著則貪競
之路銷自然朝廷無爭祿之人選司有撝謙之士仍請寬立年限
容其察訪簡汰堪用者試令職守以觀能否參驗行事以別是非
不實免王丹之官得人如翟璜之賞自然見賢不隱食祿不專苟
或進鍾繇郭嘉劉陶薦李膺朱穆勢不云遠有稱職者受薦賢之
賞濫舉者抵欺罔之罪自然舉得才行則君子之道長矣

通典
舊唐書薛

登傳

唐會要

據通鑑在此年

四月改元爲如意

舊書本紀

九月庚子改元爲長壽

舊書本紀

進士

按是年登科記不載蓋脫佚也

長壽二年

癸巳

二月

通鑑作正月唐會要作三月

令貢舉人習則天所撰臣軌停通老子道德

經

冊府元龜

十月左拾遺劉承慶上書曰伏見比年以來天下諸州所貢物至

元日皆陳在御前惟貢人獨於朝堂拜列但孝廉秀異國之英才

既隨方物以充歲貢宜同珍幣別見王庭豈得金帛羽毛昇於玉

陛之下賢良文學棄彼金門之外恐所謂貴財而賤義重物而輕人甚不副陛下好道之心尊賢之意伏請貢舉人至元日引見列在方物之前以備充庭之禮從之

冊府元龜
唐會要

進士十八人減策及第二人

三年

甲午

四月策臨難不顧徇節寧邦科問若濟巨川必憑舟楫之勢將興大厦實仁樂樞之材聖皇提象曆符順天革命變澆風於易簡躋薄俗於醕醑未明求衣宵旰忘食無遺魚鼎不棄芻蕘聞逆耳之言怡然啟齒聽犯鱗之說假以溫顏緬懷七聖之規勞求五臣之

俊至如臨難不顧知無不爲獻替帷幄匡過補闕爰泊銜命之流
並應搜揚之指子大夫博古強學見賢思齊一善或同千載相遇
肇自漢魏以及梁陳若斯之人布在方策宜具陳年代各敘微猷
無憚米鹽用旌多識

第一道

問自周星攢耀漢日通輝象教聿興

苾薺鬱起眷茲和眾因果爲先伊此法門棟梁攸屬我皇光膺天
授託降閭浮宏八解之要津啟四禪之幽鍵濟含生於彼岸證圓
果於中天紺宇巍巍緇徒翼翼莫不譽高澄什聲重安遠振三翻
於辨囿悟兩諦於談筵飛錫煙蒸乘杯霧委蘭艾因而或糅玉石
由是難甄迹雖選於元關名乃編於白屋若欲令沙汰促以金科

將恐乖智海之宏規匪提河之遺範然則經行之所在釋氏而含
容朱紫分區談王化而期切施張之術去就何從

第二道

問神農

曰金城千里湯池百步而無粟者弗能守也然則師出以律成資
於糗糧兵雖尙奇必藉於流行皇周八紘有截四海無虞折衝樽
俎之間旋軍衽席之上而吐蕃小醜時擾於沙場默啜遺凶偷生
於玉塞由是任以精卒寄以邊陲車徒置騎實賴防禦飛芻輓粟
轉餽之弊尤深疆理屯田播植之功難就欲使人無憂於半菽歲
有積於如坻強國富庶仁聆良策

第三道
文苑英華

五月甲午改元爲延載

舊書本紀
新書本紀

不貢舉

諸科二人

臨難不顧徇節寧邦科

薛稷

見冊府元龜

寇玘

見冊府元龜

薛稷對策曰后克艱厥后臣克艱厥臣是羣龍無首虛己明庭之上
上鷦鷯全身深穴神邱之下故有旁於一饋不輟子高之耕待以
二旌無過屠羊之肆懷乎秋駕既識爲君之難踟此春冰未見爲
臣之易然而夢弼降佐風起雲從其天祐之俊又將制當今制賢
以祿制傳以庸設言不違式化厥訓霸王騏驥翼天駒而齊衡社
稷元龜升帝寶而負兆猶是幽芳在採雲逸來羈垂倒影之懸光

燭重泉之沈隱故遠臣得離山草比獻野芹瞻望天臺數跡對口
帝德廣運六臣參其業天道大明五帝陳其序猶黼黻之章五色
鼎鼎之飪五味五靈之效禎祥五音之和雅樂若乃同義變力古
人中求則紀信誑項以免君王經刎頸以紓國九卿居府王脩從
赴難之義二國合圍路中無返言之失漢帝之憚汲黯陳主之畏
柳莊社稷之臣於是乎在恪居爾位勤不告勞則蕭公堂堂吳漢
糾糾馮豹伏於閣下黃公宿於臺上憂公奉國可以不謂忠乎書
誠面從詩詠司直犯顏無隱求福不回周昌之比漢高同乎桀紂
劉毅之方晉武類彼桓靈申屠剛之軻車鍾離意之排閭史魚是

慕直在其中聖人謨議君子謀道張良之翼漢王郭嘉之協魏主
宋武之得穆之齊高之得褚彥定策決勝謀夫孔多蓬矢桑弧有
志四海飛旌插羽道好二同膠柱豈調絃之術飲冰實將命之難
陸賈南行賁蠻夷之失禮陳湯西討誅單于之暴慢終令趙佗貢
職郅支傳首竹帛所載斯其庶乎謹對

第一道

竊惟善本無生茲

緣常寂捨身捨智涅槃之行可觀不動不定般若之名已立蘭容
聖質剖碧玉而恆傳寶相靈模鏤紫金而尙在運二儀而迴掌魏
乎寶力極萬物之濡足皇矣能仁是以付受有歸鬱興尊紀知來
之鑒遠明於萬劫祈聖之符大啟於九部始則江漢廣被終以關

河積學由是明僧輩出賢眾肩降道行息心願澄什而服侶戒梵

禪結視安遠而俯孩雖葱嶺茄藍涉流沙而西極白木聚落浮漲

海而東馳聖教之興為期為感原注此句疑但敬重堅固有悲忍之大

權循習護持有煩惱之深淺物情以之勤切俗慕由是懇到苟求

利養或滋貪濁濫名竊服行偽學非魚目叨珍遂入摩尼之寶鳥

鵲借類便假伽藍之翼謂宜宥而勿罰限其自新卷迹緇林之遊

反服白衣之役則愍原注一作恐愚受智寬令四飛辨是決嫌浮食一

變九色揚翰不謬於楚雞六管流聲豈混於齊士庶人無量在釋

典而維弘出家有限憑國經而必恪維摩之入諸必原注疑作心藏尚

爲居士之身菩薩之惠其神通由持在家之誠未虧平等何妨

原注

一作

慎擇謹對

第二

持人之術地著爲本應敵之道糗糧爲先

故李悝盡地力而創謀本能強魏衛鞅開阡陌而急戰終以霸秦
當今三壤既平九稅有職倉庾陳積程枯充仞山川效止而成敘
陰陽感化而致和夜戎黠羌不討之日久矣天有星象以分其區
地有山河以致其險素野遐曠元國寒涼塞下三春未辨重重之
樹河邊九目已落青青之草我后惻隱嚴廊之下垂拱衽席之上
聖智備元地神武動山岳悠然遠覽白露涼秋建日月朱鳥之旗
樹風雨蒼牛之轡

疑

將帥良猛謀慮深長猶重息人未脩伐鬼而

大羊無檢時驚邊析定遠侯之功略還出玉門成校尉之七營更
連金郡麻奴小醜敢懷凌斥之心榆鬼殘祆仍延暑刻之命結山
寨而嘯聚驅殺馬而陸梁百萬之師糗糧易盡空虛之地轉餉難
集良可追蹤墜草取彼大田脩充國之舊圖採威明之遠算將軍
素勵爰與斷河之術都尉垂強畢盡通溝之利舉農夫而休戰士
息轉輸而用耕牛智效其謀勇奮其力資厲金之如粟藉邊馬之
如羊賞士犒師選騎館穀或休垣罷障城滅途殫然後坐鳳皇之
臺驗麒麟之貢王旅凱入豈不休哉清問徒訓原注危言每竭短
才扞軸景夕貽憂謹對

第三道

文苑英華